

Vorrede.



Gottes Mayestet/ Herrligkheit vnd Macht/ Auch seine vnausz-
sprechliche Weisheit/ Güte/ vnd Treu/ wird fürnemlich auß seinem Herrli-
chen wunderbarn geschöpff erkandt/ wie auch der Heydnisch Lehrer Seneca sagt.
Das Gott alle sein geschöpff/ so gut vnd nutzlich zu vnser Wolfart geschaffen
hat/ das macht/ er ist gütig vñ treu/ das es aber alles so schon vnd artlich geordnet/ vñ disponirt
worden/ das macht seyne vnerforschliche Weisheit/ vnd das ihm aber/ an keynem Wöllen ge-
mangelt/ das ist sein allmechtige Krafft vnd Herrligkheit/ darumb sol billich von allen Mensch-
en/ Sonderlich aber von vns Christen/ als Gottes geschöpff/ immerdar der Herr vnd schöpffer
geehret vnd geprenstet werden/ wañ wir anschawen sein gewaltig gebew/ Himmel vnd erden vnd
die herrlichen liechter Sonn Mohn/ vnd Stern/ damit er den Himmel gezieret hat/ auch alles das
so im Himmel vnd Erden beschlossn ist/ dan er hats alles erschaffen/ vnd es erhalt für vnd für im
ordenliche wesen vnd lauff/ durch sein heyligs ewigs wort/ vnd thut noch teglich grosse wunder
im Himmel vnd auff Erden. Dem sey lob ehr vnd preys von ewigkheit zu ewigkheit Amen.

Dañ als Gott Himmel vnd Erden erschuff (sagt Moses) sprach er/ es werde
Licht/ vnd es ward licht/ vnd Gott sahe das/ das Licht gut war/ da scheidet Gott das
Licht von der Finsternus/ vnd nennet das licht Tag/ vnd die finsternus Nacht/ er setzet auch
die herrlichen liechter/ an die feste des Himmels/ das sie auff erden scheinen/ zu scheyden tag vnd
nacht/ auch zu geben Zeichen/ Zent/ Jar vnd tag. Gott erschuff auch den Menschen nach sei-
nem ebenbildt/ vnd begabet ihn/ mit einem herrlichen licht/ inn seiner Seel vnd hertzen/ damit
zu Contempliren vnd zuerfüllen seinen ewigen göttlichen willen/ Er zieret ihn auch an seinem
Leib/ mit zweyen schönen liechtern/ damit an zuschawen/ die himlischen Körper vnd geschöpff
vnd zuerkennen/ das Gott gnedig sey/ vnd sein gütigkeit für vnd für weret.

Wie wunderbarlich hat nur der liebe Gott die vier Elementa/ vnd der selbigen fünffte wesenheit
vnter dem himmel geordnet/ darauß alle irdische Körper/ vnd wir menschen selbs/ genaturet vnd
gemessigt werden/ vnd ein jeder sein Complexion vnd eigenschafft hat/ also/ das das Feuer vnd
Wasser/ bedes zugleich in einem Körper als im auge verfasst vnd erhalten werden mügen/ vnd
doch also/ das das feur vom wasser nit erlescht/ desgleiche das wasser durchs feur nit gentslich
verzert/ vnd aus gedruckt wird. Wer könt nur die grossen wunder Gottes/ genugsam erzeien
vnd aussprechen/ es heyst ja wie der Königlich Prophet Dauid sagt/ wunderbarlich sind die
werckhe des Herren.

Vnd gleich wie Gott für vnd für wircket in seinem geschöpff/ also sollen wir auch werckhen
vnd nit feyren/ alles zu seinem heiligen lob/ vnd zu bestem nutz vnser nexten/ ein jeglicher nach
der gabe die im got geben hat/ wie Paulus lert/ dan ob wol die gaben vnd Künst vngleich sind/
vnd bey einem menschen herrlicher vñ grosser leuchten als bey dem andern/ so kompt es doch
alles von einem vñ ewigen Geber/ der auch rechenschafft erfordern wird zu seiner zent/ von
eines jeden verwaltung am tag seiner herrligkeit/ so wol von dem jenigen dem ein einiges pfunde
vertraut ist/ als dem so Zehen pfundt in verwaltung empfangen hat/ Derhalben ja niemands
sein gegebenes pfundlein im schweyßthuch verbergen/ sondern seinem nexten zu nutz vnd wol-
fart damit dienen soll/ nach seinem besten vermügen/ dieweyl niemand der geringsten eines mit
sich auß disem jamerthal führen kan/ nichts haben wir inn diese Welt bracht/ auch offenbar ist/
das wir nichts darauß bringen werden.